



## 17 OBXECTIVOS PARA QUE O MUNDO SEXA MELLOR EN 2030

DUVI 01/02/2019

Por primeira vez na historia, a humanidade deseñou de xeito conxunto unha proposta común para traballar de xeito conxunto polo futuro do planeta. A Axenda 2030 é precisamente unha folla de ruta que foi aprobada por 193 países, un plan de acción global que busca avanzar na prosperidade, na xustiza e na paz universal a través de 17 obxectivos, os denominados Obxectivos de Desenvolvemento Sostible (ODS). [+info](#)



Alba Salgado, Irene Villanueva e María Simón.

## EXPOUNIVERSITAS AMOSA 36 EXEMPLOS DE INNOVACIÓN E INVESTIGACIÓN FEITOS NAS AULAS

O contaxio dos bocexos entre persoas, os petróglifos na conca fluvial do Barbantiño; que refresco ten máis azucre, cal é a razón de que uns flocos de millos exploten e outros non, que características consideran as e os futuros docentes que debe ter o profesorado de Educación Infantil... Todos estes temas e moitos outros, ata un total de 36, foron presentados este venres en Expouniversitas 2019. Fórum de Innovación e Investigación Universitaria, celebrado no campus de Ourense. [+ info](#).



Mesa redonda sobre os ventres de alugueiro do ano 2018.

## ATA 3000 EUROS ÁS ACTIVIDADES DOCENTES QUE IMPULSEN OS VALORES IGUALITARIOS

DUVI 04/02/2019

A Unidade de Igualdade convoca as axudas de financiamento para a organización de actividades docentes que, por unha banda, promovan a perspectiva de xénero e que, por outra, estean enfocadas ao alumnado de calquera rama de coñecemento. Esta iniciativa, que ten unha partida orzamentaria de 20.000 euros, xorde ao abeiro do II Plan de igualdade entre mulleres e homes da Universidade de Vigo do ano 2016. [+info](#).



Dúas alumnas participando nos obradoiros celebrados en febreiro do 2018.

## A UNIVERSIDADE VOLVE ABRIR AS PORTAS DOS SEUS LABORATORIOS ÁS MOZAS DE ENSINO SECUNDARIO

D. BESADÍO DUVI 04/02/2019

Darlle visibilidade ao traballo das científicas e crear roles femininos no eido da ciencia e a enxeñaría. Con estes dous grandes obxectivos a Universidade, coincidindo coa celebración do Día Internacional da Muller e da Nena na Ciencia, volverá abrir as portas dos seus laboratorios ás mozas de ensino secundario tanto de Vigo como da súa contorna. Será este mércores 6 de febreiro no campus de Ourense e o luns 11 no de Vigo, onde está previsto a realización de múltiples obradoiros espallados polo Edificio de Ciencias Experimentais, o Cinbio e as escolas de Enxeñaría Industrial e Enxeñaría de Telecomunicación. [+info](#)



María Fernández durante a súa intervención.

## O CICLO CAFÉ CON SAL FIXA A SÚA OLLADA NA ESTRUCTURA FILOXENÉTICA DA PESCADA

DUVI 05/02/2019

A novena edición do ciclo de conferencias Café con Sal arrancou hai dúas semanas cunha sesión dobre, pero este martes o programa contou coa primeira convidada da Universidade de Vigo. María Fernández, investigadora predoutoral de Recursos Xenéticos Mariños (ReXenMar) do CIM-UVigo e do grupo AquaCOV do Instituto Oceanográfico de Vigo, foi a encargada de abrir a representación da UVigo neste ciclo e fíxoo cun relatorio titulado *Hakes of the world: clarifying the phylogenetic status of five candidate species*, na que presentou a metodoloxía e algúns dos resultados da súa tese doutoral. [+info](#).



Presentación do simposio internacional.

## 40 ESPECIALISTAS DE CINCO PAÍSES PARA AVANZAR NO TRATAMENTO DE ENFERMEDADES RARAS E ULTRA RARAS

ROSA TEDÍN DUVI OURENSE 05/02/2019

O campus de Ourense acollerá os días 28 e 29 de marzo o I [Simposio Internacional de Ciliopatías e Síndrome de Bardet Biedl](#). A cita, organizada por Anasbabi Ciliopatías coa colaboración da Universidade de Vigo e outras entidades, reunirá a máis de 40 expertos estatais e internacionais en enfermidades raras e ultra raras. Subliñando a relevancia internacional do evento, desde a organización destacan como o simposio “representa un fito”. [+info](#).



## PRIMEIRA CITA DO 2019 COA RECICLAXE DE APARATOS ELÉCTRICOS E ELECTRÓNICOS

DUVI PONTEVEDRA 05/02/2019

“Se se enchufa, leva pilas ou batería, nalgún momento será un RAEE que hai que reciclar”. Deste xeito preséntanse os RAEE’s, os residuos de aparellos eléctricos e electrónicos, nos materiais informativos da semana de recollida, que ao abeiro do proxecto Green Campus, a Vicerreitoría do campus promove por novena vez desde este luns. Ata este venres 8, as diferentes facultades e escolas, así como o Pavillón Universitario, a Casa das Campás e a Escola Infantil do campus. [+info.](#)



Elas: presente e futuro da ciencia, a tecnoloxía, a enxeñaría e as matemáticas.

## ELAS: PRESENTE E FUTURO DA CIENCIA, A TECNOLOXÍA, A ENXEÑARÍA E AS MATEMÁTICAS

DUVI OURENSE 05/02/2019

O edificio Politécnico do campus de Ourense acolleu este mércores a celebración da II Xornada de Divulgación en Ciencia, Tecnoloxía, Enxeñaría e Matemáticas *Exxperimenta en feminino*. Nela, 90 investigadoras e universitarias e 230 escolares compartiron tempo e coñecementos co obxectivo de fomentar as vocacións científico-tecnolóxicas entre rapazas e rapaces facendo fincapé na visibilización das mulleres científicas e tecnólogas e do seu traballo. [+info.](#)



En Madagascar hai 50 especies de lémures todas elas endémicas.

## DIVULGARE VIAXA A MADAGASCAR PARA AMOSAR UN DOS LUGARES MÁIS DIVERSOS E SINGULARES DA TERRA

M<sup>a</sup> DEL CARMEN ECHEVARRÍA DUVI 06/02/2019

Na peza audiovisual que fai o número 45 das producidas por Divulgare, as e os integrantes do grupo de investigación en Ecoloxía e Evolución das Plantas da Universidade de Vigo trasladan ás e aos seus espectadores a Madagascar, “un dos lugares do planeta máis peculiares no que se refire a biodiversidade”, asegura Luis Navarro coordinador de Divulgare. Pero máis aló da súa finalidade divulgativa, este novo vídeo tamén ten un obxectivo claramente reivindicativo: “o do interese en saír ao campo a aprender Bioloxía porque... hai moito que aprender fóra das aulas tamén!”, sinala Navarro. [+info.](#)



A sesión celebrouse na aula magna José Ángel Valente.

## O PROCEDEMENTO PARA ELABORAR O NOVO PLAN ESTRATÉXICO DA UNIVERSIDADE DE VIGO BOTA A ANDAR

ROSA TEDÍN DUVI 06/02/2019

O campus de Ourense acolleu este mércores a primeira sesión ordinaria de 2019 do Claustro Universitario. Nela, as e os representantes dos diferentes sectores da Universidade de Vigo tiveron a oportunidade de abordar temas relacionados con algúns dos grandes retos que ten a institución académica nos vindeiros anos, como son a captación de alumnado, a súa masa salarial, a loita pola igualdade de xénero e a creación de universidades privadas. Con ese marco de fondo, na reunión aprobouse o inicio do procedemento para a elaboración do novo plan estratéxico da Universidade de Vigo. [+info.](#)



Implusores e impulsoras da campaña, xunto co decano, Vicente Romo.

## ALUMNADO DO CAMPUS COORDINA UNHA CAMPAÑA PARA DAR VISIBILIDADE Á MULLER NO DEPORTE

DUVI PONTEVEDRA 06/02/2019

Dar maior visibilidade ao papel das mulleres no ámbito deportivo é o obxectivo principal da campaña *#SoyMujerSoyDeporte*, que, nas semanas previas ao 8 de marzo, Día Internacional da Muller, promove por segundo ano consecutivo a Asamblea Nacional de Estudiantes de Ciencias de la Actividad Física y del Deporte (Anecafyde). Unha campaña que neste 2019 coordina un grupo de estudantes da Facultade de Ciencias da Educación e do Deporte e que suma a difusión de vídeos en redes sociais a comercialización dunha serie de pulseiras co propósito de recadar fondos destinados á Asociación Mujeres en el Deporte Profesional. [+info.](#)



Sandra Martiño, traballadora do Gabinete Psicopedagóxico no campus vigués..

## OS PROBLEMAS DE AUTOESTIMA E A ANSIEDAD, AS CAUSAS MÁIS HABITUAIS DE CONSULTA NO GABINETE PSICOPEDAGÓXICO

ANA PROUPÍN DUVI 07/02/2019

O Gabinete Psicopedagóxico da Universidade de Vigo, un servizo gratuíto, confidencial e aberto a toda a comunidade universitaria, ofrece atención personalizada nos ámbitos educativo, profesional e persoal, e aborda temas como a autoestima, os hábitos de estudo e as dificultades propias de cada quen co obxectivo de axudar no desenvolvemento integral das e dos usuarios. [+info.](#)





Marco Lucato, o alumno de Ciencias da Educación e do Deporte; Marlene Armenteiro, Manuel Pérez Cabo, a coordinadora de proxectos de Xuntos Down Paula Villaverde e Jorge Soto

## ESTUDANTES UNIVERSITARIOS E USUARIOS DE XUNTOS DOWN COMPARTIRÁN UN TALLER DE EDUCACIÓN MUSICAL

EDUARDO MUÑOZ DUVI PONTEVEDRA 07/02/2019

Oito mozos e mozas, usuarios e usuarias de etapa educativa da asociación Xuntos Down Pontevedra, e outros oito alumnos e alumnas da Facultade de Ciencias da Educación e do Deporte compartirán clases e aprendizaxe no taller *Mi, re, do* de ensino musical para a inclusión, unha proposta formativa que se desenvolverá desde este venres neste centro do campus pontevedrés. Impartido pola profesora de música Marlene Armenteiro, este taller de oito sesións, que se desenvolverá entre os meses de febreiro e abril, busca por unha banda achegar formación musical a este grupo de oito mozos e mozas con síndrome de Down, de entre 11 e 18 anos, á vez que achegar a estudantes do grao en Educación Primaria ao desenvolvemento dun proxecto formativo centrado na inclusión. [+info.](#)

5



## PRETO DE 800 PERSOAS PARTICIPARÁN ESTE MES NUN FORO INTERNACIONAL SOBRE A EDUCACIÓN

DUVI PONTEVEDRA 08/02/2019

Servir como un foro de intercambio de coñecementos e experiencias didácticas entre profesorado e alumnado de todas as etapas educativas é o propósito central do [II Congreso Mundial de Educación Educa 2019](#), que entre o 21 e o 23 de febreiro desenvolverase na Cidade da Cultura, en Santiago de Compostela, e que conta con máis de 800 inscritos e inscritas, segundo explica a investigadora da Facultade de Ciencias da Educación e do Deporte Maite Abilleira, unha das integrantes do comité organizador dun evento promovido pola asociación Educa, coa colaboración das tres universidades galegas. 29 conferencias e a presentación de 166 comunicacións e pósters integran o programa dun evento que se completa, o sábado 23, coa celebración da gala de entrega dos Premios Educa Abanca ao mellor docente de España. [+info.](#)



Imaxe dunha sesión do primeiro cuadrimestre.

## O PERCORRIDO DOS MARTES SAUDABLES POLOS TRES CAMPUS ARRANCARÁ O 19 DE FEBREIRO

ROSA TEDÍN DUVI OURENSE 08/02/2019

O día 19 de febreiro os postos dos Martes Saudables volverán a iniciar o seu percorrido cuadrimestral polos tres campus da Universidade de Vigo cunha primeira sesión no campus de Ourense, concretamente no edificio Xurídico-Empresarial. A iniciativa, nada en 2011, continuará fomentando os bos hábitos de vida, desde o deporte á sexualidade, entre os membros da comunidade universitaria. Nesta ocasión dedicarán especial atención á realización de probas de enfermaría, un dos aspectos máis demandados en cada sesión. [+info.](#)



Alumnas nun obradoiro celebrado nun dos Laboratorios de Ciencias Experimentais.

## AS TITULACIÓNS TECNOLÓXICAS E CIENTÍFICAS LÁNZANSE Á CAPTURA DE TALENTO FEMININO

DUVI 11/02/2019

“O noso obxectivo é atoparvos nas aulas e nos laboratorios, primeiro como alumnas e logo tamén como docentes, non podemos roubarlle á sociedade a metade do seu talento”. Así de rotundo se amosou este luns o reitor da Universidade de Vigo Manuel Reigosa no acto de benvida a un grupo de alumnas que participaron na Escola de Enxeñaría de Telecomunicación nas Xornadas conmemorativas do 11 de febreiro, o Día Internacional da Muller e a Nena na Ciencia, unha data que trouxo ata o campus un cento de alumnas de terceiro e cuarto de Ensino Secundario Obrigatorio de catro institutos da contorna viguesa. [+info.](#)



Cruz Vemella achegou a súa campaña de sensibilización a Belas Artes..

## CRUZ VERMELLA BUSCA NO CAMPUS NOVOS VOLUNTARIOS E VOLUNTARIAS

DUVI PONTEVEDRA 12/02/2019

Programas de apoio escolar a nenos e nenas e de animación hospitalaria, obradoiros de educación para a saúde e prevención da violencia en centros de ensino, clases de español para inmigrantes, obradoiro de pintura, actividades lúdico-educativas coa infancia, acompañamento a persoas maiores... Co propósito de dar a coñecer os múltiples ámbitos nos que a cidadanía pode colaborar como voluntario no labor de Cruz Vermella, esta organización desenvolve unha campaña de sensibilización que esta martes se achegou ata a Facultade de Belas Artes. [+info.](#)



De esquerda a dereita, o comité de organización da Universidade de Vigo: Alberto Castejón, M.Carmen Somoza e Ricardo Vidal.

## ESPECIALISTAS INTERNACIONAIS DANSE CITA EN VIGO NO COLOQUIO INTERDISCIPLINAR EN TOPOLOXÍA

DUVI 12/02/2019

Do 19 ao 22 de xuño a Escola de Enxeñería Industrial da Universidade de Vigo acollerá o segundo *Coloquio Interdisciplinar en Topoloxía* e as súas aplicacións, que reunirá a especialistas internacionais que traballan en diferentes áreas da topoloxía, unha rama das matemáticas que estuda as propiedades dos corpos xeométricos que permanecen invariantes. [+info.](#)



En Ciencias Sociais e da Comunicación recolléronse preto de 60 aparellos.

## O CAMPUS REÚNE MÁIS DE 160 APARELLOS NA CAMPAÑA DE RECOLLIDA DE RAEES

DUVI PONTEVEDRA 12/02/2019

A novena edición da Semana de Recollida de RAEES (Residuos de Aparellos Eléctricos e Electrónicos), promovida pola Vicerreitoría do campus, permitiu reunir nos diferentes centros do campus un total de 163 aparellos, contribuíndo así ao correcto tratamento duns residuos con compoñentes contaminantes. 15 teléfonos móbiles e fixos, nove ordenadores e portátiles, sete pantallas ou monitores ou cinco impresoras son algúns dos equipamentos que a comunidade universitaria depositou nos diferentes puntos de recollida nos que, ao longo da pasada semana, se desenvolveu a novena edición desta iniciativa inserida no proxecto Green Campus. [+info.](#)



Eulalia Agrelo e Carmen Fouces.

## LUSOFONÍA E REVOLUCIÓN, EIXOS DO II CONGRESO INTERNACIONAL DE MEDIACIÓN LECTORA

EDUARDO MUÑIZ DUVI PONTEVEDRA 13/02/2019

Orientado a profesorado en exercicio, a futuros e futuras docentes, a técnicos de bibliotecas e a todo tipo de actores vinculados á selección e provisión de materiais de lectura á infancia e mocidade, o II Congreso Internacional de Mediación Lectora celebrará a súa segunda edición entre o 27 e o 30 de marzo, no marco das actividades do X Salón do Libro Infantil e Xuvenil. Farao situando a lusofonía e a revolución como eixos dun foro que, como explica a profesora da Facultade de Ciencias da Educación e do Deporte e coordinadora do congreso, Eulalia Agrelo, achegará ao Pazo da Cultura de Pontevedra “persoas de renomeado prestixio dentro do ámbito da literatura infantil e xuvenil”, chegados desde Brasil, Portugal ou Angola. [+info.](#)



María Consuelo Pérez, vicerreitora de transferencia.

## O SECTOR DA ALIMENTACIÓN ESTREARÁ EN MARZO UNHA SERIE DE ENCONTROS UNIVERSIDADE-EMPRESA

D. BESADÍO DUVI 14/02/2019

Promover un primeiro contacto entre investigadores/as e empresas, ter a oportunidade de dar a coñecer ás empresas o potencial da comunidade investigadora da Universidade de Vigo, achegarse de primeira man as necesidades de innovación da contorna produtiva e planear xuntos posibles vías de colaboración. Estes son os catro grandes obxectivos cos que a Vicerreitoría de Transferencia pon en marcha os primeiros Encontros Universidade-Empresa, unha iniciativa que arrancará o vindeiro mes de marzo co sector da alimentación e que se prolongará ao longo de todo o ano 2019 coa participación dos diferentes sectores empresariais.[+info.](#)



Foto de familia dos participantes.

## A UNIVERSIDADE PARTICIPA EN BIRMINGHAM NUN ENCONTRO INTERNACIONAL PARA PROMOVER O USO DOS NANOFLUÍDOS

D. BESADÍO DUVI 18/02/2019

A Universidade de Vigo participou este mes en Birmingham nunha das xuntanzas de seguimento da rede europea Cost Action Nanouptake, unha iniciativa integrada por máis de 35 grupos de investigación de 25 países, entre eles dous vigueses: Enxeñaría Solar e Refrixeración e Física Aplicada II, ao que pertence o profesor Luis Lugo, integrante do comité de xestión da rede e representante da institución académica viguesa neste encontro internacional.[+info.](#)



## A EE DE MINAS E ENERXÍA ORGANIZA UN CONCURSO DE FOTOGRAFÍA PARA VISIBILIZAR AS MULLERES NAS PROFESÍONS TÉCNICAS

DUVI 19/02/2019

A fotografía serve para retratar diferentes realidades e mesmo denunciar desigualdades. Con este obxectivo, ao abeiro do Día Internacional da Muller, a Escola de Enxeñaría de Minas e Enerxía da Universidade de Vigo organiza o concurso de fotografía MULLE.Rme para dar visibilidade ao sexo feminino nas profesíons técnicas.[+info.](#)





O investigador antonio Villanueva analiza as consecuencias das novas regulacións sobre o acceso xenéticos.

## O INVESTIGADOR ANTONIO VILLANUEVA ANALIZA AS CONSECUENCIAS DAS NOVAS REGULACIÓNS SOBRE O ACCESO AOS RECURSOS XENÉTICOS MARIÑOS

DUVI 19/02/2019

O proxecto European Blue Biobank (EBB), liderado polo Centro de Investigación Mariña da Universidade de Vigo, ten dous obxectivos fundamentais. Por unha banda, coordinar os biobancos que están dentro do European Marine Biological Resource Centre, EMBRC, e, por outra, desenvolver unha guía de boas prácticas para cumprir coa nova lexislación sobre acceso aos recursos xenéticos. Sobre esta segunda parte centrou o seu relatorio o investigador Antonio Villanueva na terceira sesión do ciclo de conferencias Café con Sal, que promove a Ecimat.[+info.](#)



A exposición "sen Moldes II" pode verse no primeiro andar da Facultade de Belas Artes..

## O ALUMNADO DE BELAS ARTES REFLEXIONA SOBRE OS ROLES DE XÉNERO A TRAVÉS DE 19 FOTOGRAFÍAS

EDUARDO MUÑIZ DUVI PONTEVEDRA 20/02/2019

Promover unha reflexión, a través da fotografía, sobre os roldes de xénero, a violencia machista e a orde sexual imposta é o propósito central do exercicio que, no marco da materia *Técnicas fotográficas*, os docentes Mar Caldas, Andrés Pinal e Carlos Tejo propuxeron ao alumnado do grao en Belas Artes. Das propostas que, no marco desta materia de primeiro curso, achegaron máis dun cento de alumnos e alumnas saíron as 19 fotografías que integran *Sen Moldes II*, unha exposición que desde este mércores se exhibe no primeiro andar da Facultade de Belas . [+info.](#)



Imaxe de grupo das e dos participantes.

## 14 NOVAS EMBAIXADORAS E EMBAIXADORES DA NECESIDADE DE FACER UN USO RESPONSABLE DOS ANTIBIÓTICOS

ROSA TEDÍN DUVI OURENSE 20/02/2019

Desde o pasado 8 de febreiro e ata este mércores día 20, un grupo de 14 alumnas e alumnos de cuarto curso de Educación Secundaria Obrigatoria do IES O Couto de Ourense participaron nunha iniciativa do nodo na Universidade de Vigo do proxecto MicroMundo. Póndose na pel de científicos en busca de bacterias de interese médico, o alumnado aprendeu a importancia de facer un uso responsable dos antibióticos.[+info.](#)



O cumpus acolle unha xuntanza do proxecto europeo Elemend.

## VIGO ASESORA A UNIVERSIDADES BALCÁNICAS SOBRE A CREACIÓN DE PLATAFORMAS DE MICRO-LEARNING

DUVI 21/02/2019

O proxecto Elemend (Electrical Energy Markets and Engineering Education) está deseñado para facilitar que os plans de estudo relacionados coa Enxeñaría eléctrica nas universidades dos Balcáns occidentais sexan competitivos a través da ensino e a capacitación en tecnoloxías de redes e microrredes intelixentes e nos mercados de electricidade. Tras esta proposta están universidades de España, Austria, Letonia, Bosnia e Hercegovina, Montenegro, Serbia e Kosovo. Vigo é a única representante estatal e esta semana acolle o quinto obradoiro de traballo, na que están a participar representantes de varias das institucións implicadas. [+info.](#)



Un intre da inauguración deste congreso.  
Foto: Concello de Santiago.

## PRESENTE E FUTURO DA EDUCACIÓN DEBÁTENSE NUN FORO INTERNACIONAL CON MÁIS DE 800 ASISTENTES

DUVI PONTEVEDRA 21/02/2019

Con máis de 800 inscritos e inscritas, o II Congreso Mundial de Educación Educa 2019, que a asociación Educa promove coa colaboración das tres universidades galegas co propósito de servir como un foro de intercambio de coñecementos e experiencias didácticas entre profesorado e alumnado de todas as etapas educativas, celebra este xoves a súa xornada inaugural na Cidade da Cultura. Promovido por unha asociación integrada por investigadores das tres universidades galegas, co apoio da plataforma MIAC (Maestros Innovadores Alumnos Competentes). [+info.](#)



Sergio Ramos, técnico da OMA, e Alejandro Prado, bolseiro do Gruvi..

## O GRUPO DE RECICLAXE INFORMÁTICA BUSCA ALUMNADO PARA TRABALLAR NA RECUPERACIÓN DE EQUIPOS

DUVI 22/02/2019

A tecnoloxía avanza rápido e a renovación de material informático é importante, pero isto non quere dicir que haxa que desfacerse dos ordenadores, impresoras ou pantallas vellas, xa que poden ter unha segunda oportunidade antes de ser totalmente descartados. Conscientes desta realidade a Universidade de Vigo puxo en marcha no ano 2006 o Grupo de Reciclaxe Informática, Gruvi, equipo integrado na Oficina de Medio Ambiente e que se ocupa de arranxar os equipos que quedaron en desuso para doalos a entidades sen ánimo de lucro. [+info.](#)



Mentoras de Inspira Steam.

## TITULADAS POLA UNIVERSIDADE E AGORA FORMADAS PARA “INSPIRAR” ÁS CIENTÍFICAS E TECNÓLOGAS DO FUTURO

M<sup>a</sup> DEL CARMEN ECHEVARRÍA DUVI 22/02/2019

Son 18 mulleres egresadas pola Universidade de Vigo, na súa maior parte nas enxeñarías industrial, de telecomunicación e minas. Todas están en activo, algunhas á fronte de empresas creadas por elas mesmas e nalgúns casos, mesmo imparten clase nos centros nos que un día foron alumnas. E desde esta semana todas elas son ademais mentoras do proxecto Inspira Steam Galicia, unha iniciativa que tivo a súa orixe na Universidad de Deusto coa finalidade de promover as vocacións científicas e tecnolóxicas entre as nenas, e arredor da que a Universidade de Vigo comezou a traballar hai case un ano coa iniciativa IREI, Inspirando ás Rapazas para Estudar Enxeñería. [+info.](#)



Fátima Braña e Sofia Godoy.

## UN ESTUDO PIONEIRO DETECTARÁ OS ESPAZOS URBANOS PERCIBIDOS COMO INSEGUROS POLAS MULLERES EN OURENSE

DUVI 25/02/2019

O Concello de Ourense elaborará un estudo pioneiro no ámbito estatal para detectar os espazos urbanos percibidos como inseguros polas mulleres no que participarán especialistas da Universidade de Vigo. O seu obxectivo será “detectar as necesidades das mulleres respecto ao uso de espazos públicos e para elaborar ferramentas que permitan que o uso destes non sexa limitativo por cuestión de xénero”, segundo explican en nota de prensa desde a entidade municipal. [+info.](#)



Ferreira, Nogueira, Soto e Cancela presentaron este proxecto na Casa das Campás.

## A UNIVERSIDADE PARTICIPA NUN PROXECTO EUROPEO QUE ESTUDA COMO MOTIVAR AS PERSOAS MAIORES A FACER DEPORTE

EDUARDO MUÑOZ DUVI PONTEVEDRA 26/02/2019

Afondar nos factores supoñen unha motivación nas persoas maiores cara a práctica deportiva e de actividade física é o obxectivo central do proxecto europeo *In Common Sports (Intergenerational Competition as Motivation for Sport and Healthy Lifestyle of Senior Citizens)*, cofinanciado polo programa comunitario Erasmus+ Sport e liderado pola Cámara Municipal de Vila Nova de Cerveira. [+info.](#)



Espazo no que se reúnen os diferentes stands da Universidade de Vigo en Edugal..

## A UNIVERSIDADE PROXÉCTASE EN EDUGAL COA SÚA MAIOR REPRESENTACIÓN NESTA FEIRA

DUVI PONTEVEDRA 27/02/2019

Máis de 5000 estudantes, segundo a organización, pasarán entre este mércores e este venres pola oitava edición do Salón de Oferta de Educación e de Formación de Galicia Edugal, que nesta xornada celebrou a súa inauguración no Pazo da Cultura e no que a Universidade de Vigo participa coa súa maior representación ata a data no evento que promove a Asociación de Empresarios da Pequena e Mediana Empresa de Pontevedra (Aempe) e que reúne a un total de 56 expositores. 17 facultades e escolas dos tres campus contan cun stand propio no espazo no que a institución académica busca achegar información e asesoramento aos que poden ser os seus futuros alumnos e alumnas.[+info.](#)

12



Neste curso seis alumnos están a participar de xeito experimental.

## ESTUDANTES ERASMUS EXERCERÁN DE VOLUNTARIOS EN COLEXIOS E INSTITUTOS PARA XERAR CONCIENCIA INTERCULTURAL

DUVI 28/02/2019

En 2017 o programa Erasmus cumpría 30 anos e, ao longo dese tempo, nove millóns de estudantes de universidades europeas tiveron a oportunidade de completar os seus estudos noutro país. Cada un destes alumnos e alumnas é un potencial embaixador do seu país, da súa cultura, da súa lingua... un potencial que o proxecto europeo Social Erasmus+ quere aproveitar. Trátase dunha iniciativa posta en marcha por un consorcio do que forman parte tanto asociacións xuvenís como universidades para achegar os estudantes internacionais ás escolas primarias e secundarias locais fomentando así un diálogo aberto entre as culturas e a conciencia intercultural.[+info.](#)





---

## UNIVERSIDADE DE VIGO

### **Unidade de Análisis e Programas.**

Edificio Filomena Dato.

Planta Baixa.

36310 Vigo (Pontevedra)

986.818.689 986.818.640